



B
128
C82L45
1751
v.11

五聖編年世紀第十一冊目錄

卷之二十一

元太祖 三冊

太宗 四冊

憲宗 一冊

世宗 中興 聖元 五冊

成宗 元貞 則 大德 七冊

武宗 至大 四冊

仁宗 皇慶 一冊 延祐 一冊

四庫全書

至聖編年世紀第十一冊目錄

卷之二十一

元太祖 三則

太宗 三則

憲宗 一則

世祖 中統四則 至元五則

成宗 元貞一則 大德七則

武宗 至大四則

仁宗 皇慶一則 延祐一則



英宗 至治一則

泰定帝 泰定二則

文宗 至順三則

順帝 元統一則 至元四則 至正八則

卷之二十二

明太祖 吳公二則 洪武十八則

惠宗 建文二則

成祖 永樂七則

仁宗 洪熙一則

宣宗
宣德二則

英宗
正統三則

代宗
景泰四則

英宗
天順四則

憲宗
成化八則

孝宗
弘治六則

武宗
正德七則

世宗
嘉靖十二則

穆宗
隆慶四則

神宗

萬曆八則

光宗

泰昌一則

熹宗

天啟五則

懷宗

崇禎九則

至聖編年世紀卷之二十一



婁東嘉定李

灼松亭

全輯

新安古歙黃

晟曉峰

肯堂德紹

男李

思堡守臣全校

男黃爲莢筠圃

元

太祖十三年元太師木華黎承制拜孔元用襲封衍

聖公給印

見家譜

太祖十五年以孔元用世襲曲阜令

見闕里志

太祖二十年以五十二代孫孔之全襲封衍聖公兼

曲阜令

見家譜

太宗元年加孔之全奉訓大夫

太宗五年仍以孔元措襲封衍聖公孔之全正充曲

阜令

太宗九年詔以燕京南京等處尚有太常禮樂官及樂工人等用鋪馬移赴東平府地方住坐分付孔元措收管令本路課稅所量給日糧就於本廟閱習聽

候用度并自來有底辭章樂器鐘磬等物盡行拘刷

以上見

關里志

憲宗二年復授孔之全襲封衍聖公兼曲阜令

見家譜

世祖中統元年詔立曲阜廟學選師儒充教授正錄

各一員改孔治爲曲阜令

見元史

中統二年夏六月詔宣聖廟有司歲時致祭月朔設

奠

見元史祭祀志

中統三年詔令楊庸教授孔顏氏之後

見元史

詔曰據孔氏顏孟之家皆聖賢之後也自兵亂以

來往往失學甘爲庸鄙朕甚憫焉可令楊庸教授
務要嚴加訓誨精通經術以繼聖賢之業

中統四年以孔治權主祀事

見闕里志

世祖至元十年詔春秋二丁執事官員各依品序穿

著公服諸儒襴衫唐巾行禮

見元史

元史祭祀志云至元十年三月中書省命春秋釋
奠執事官各公服如其品陪位諸儒襴衫帶唐巾
行禮

至元十三年六月己巳以孔子五十三代孫孔治爲

曲阜令權主祀事

見元史

至元二十二年授孔治奉訓大夫單州防禦使授孔

思誠從事郎襲縣尹

至元三十年夫子手植檜故根復發

以上見闕里志

幸魯盛典云至元三十年導江張頤來爲教授甲

午春仲東廡頹趾甃隙間茁焉其芽躬徙復於故

處矢之曰此檜日茂則孔氏日興明年春翠色蔥

然又明年丙申秩滿去喜矢言之有徵也銘以識

之

至元三十一年七月詔當崇奉曲阜林廟上都大都諸路府州縣邑應設學校

詔曰論中外百官吏人等孔子之道垂憲萬世有國家者所當崇奉曲阜林廟上都大都諸路府州縣邑應設學校書院照依世祖皇帝聖旨禁約諸官員使臣軍馬毋得於內安下或聚集問理詞訟褻瀆飲宴工役造作收貯官物其瞻學地土產業及貢士庄諸毋得侵奪所出錢糧以供春秋二丁朔望祭祀及師生廩膳貧寒老病之士爲衆所尊

教者月支米糧優恤養贍廟宇損壞隨即修完作
養後嚴加訓誨講習道藝務要成材若德行文學
超出時輩者有司保舉肅政廉訪司體覆相同以
備選用據合行儒人事理照依已降聖旨

成宗元貞元年詔孔子五十三代孫治赴闕朝見特
授中議大夫襲封衍聖公

以上見元史

成宗大德初勅到任官先謁聖廟方許以次詣諸神
廟

大德元年達魯花赤按擅不花上言願自修葺聖廟

幸魯盛典云成宗大德元年大中大夫濟寧路達魯花赤按擅不花行部至曲阜瞻拜祠下見其荒涼乃上言願自修葺一切所資首先出備如有不敷勸率好事者捐助申准許令修蓋遂自輸錢幣萬緡儲材選匠間忽奉御史臺叅詳祖庭林廟與他處不同修理盛事當出自朝廷不可使臣下獨專其美奏罷之

大德四年命按擅不花詣闕里度工起蓋聖廟

幸魯盛典云大德四年工部符下官爲給降錢物

命按擅不花詣闕里度工起蓋十二月欽奉詔書
不急之役停罷

大德五年詔修聖廟用元化錠鈔

幸魯盛典云大德五年奉中省判送本部叅詳濟
寧路奉詔書時聖廟工役已及八分若今住罷經
值霖雨損壞就用元化錠鈔僱戶修蓋

大德六年修廟殿七間神門五間費十萬餘

闕里志云大德六年修廟殿七間轉角複簷重址
基高一丈有奇內外皆石柱外柱二十六皆刻龍

於上神門五間轉角周圍亦皆石柱基高一丈悉用琉璃沒裏碾玉粧飾煥然超越前代○歷代修營廟學云大德六年九月十二日奉遷先聖十哲塑像安置於殿畫七十二賢於廊廡

大德十年命浙江行省製宣聖廟樂秋八月用於廟

祀以上見
闕里志

大德十一年加封孔子爲大成至聖文宣王

詔曰蓋聞先孔子而聖者非孔子無以明後孔子而聖者非孔子無以法所以祖述堯舜憲章文武

儀範百王師表萬世朕纂承丕緒敬仰休風循治
古之良規舉追封之盛典加號大成至聖文宣王
遣使闕里祀以太牢於戲父子之親君臣之義永
惟聖教之尊天地之大日月之明奚罄名言之妙
尚資神化祚我皇元

武宗至大元年差人依舊例致祭先師牲加太牢行
三獻禮宣賜銀幣珍藏廟庫

以上見
元史

至大二年衍聖公孔元措申保生員任性善充廟學

典籍

見闕
里志

幸魯盛典云至大二年三月中書禮部承奉中書
省劄付本部呈襲封衍聖公申朝廷降到書籍數
多缺人掌管選到本學生員任性善權行掌管如
蒙照依國子學例就將見管生員任性善設充典
籍通行掌管送據吏部呈參詳如准禮部所擬相
應覆奉都堂鈎旨連送吏依上施行奉此本部議
得襲封衍聖公申保生員任性善充廟學典籍既
已依准勾當本人例受都省劄付給降相應具呈
照詳得此除外合下都省仰照驗依上施行○初

公府止設掌書一人書籍音樂無專司元仁宗延祐間孔思晦請用辟雍故事置管勾典籍司樂三人分掌之中書集賢吏禮部胄監往復諮問數年始得置設

至大三年冬十月置曲阜宣聖廟登歌樂

至大四年詔以銀幣詣闕里祀孔子省部降到廟庭登歌樂及獻官法服並執事樂藝人禮服

以上見元史

仁宗皇慶元年遣宦者釋奠

綱鑑云皇慶元年遣宦者李邦寧釋奠於孔子既

受命行禮方就位忽大風起殿上及兩廡燭盡滅
燭臺底鉄罇入地尺許無不拔者邦寧恐悚伏地
諸執事者皆伏良久風息乃成禮邦寧慚愧累日
仁宗延祐三年詔春秋釋奠用二仲月上丁特授孔
子五十四代孫思晦中議大夫襲封衍聖公給月俸
百緡加至五百緡賜四品印

見元史

元史祭祀志云延祐三年秋七月詔春秋釋奠於
先聖以顏子子思孟子配享其日用春秋二仲月
上丁有故改用中丁○按宗子世紀思晦五十三

代浣之子也因思誠罷封襲爵贈浣中議大夫太常禮儀院同僉上騎都尉追封平郡伯再贈通議大夫太常禮部尚書上輕車都尉追封魯郡侯○幸魯盛典云孔思晦資質端敏受業於導江張顓講求理學舉茂材爲范陽寧陽兩地教諭於是族人議思晦適長且賢宜襲封爵奉祀事狀上政府未決仁宗在位雅尚儒道一日問孔子之裔今幾世襲爵爲誰廷臣具對曰未定帝取孔氏譜牒觀之曰以適襲封者思晦也復奚疑特授中議大夫

襲封衍聖公月俸一百緡加至五百緡賜四品印
○又按宗子世紀宗愿生若蒙若虛至是皆絕次
生若愚若愚生端立端立生琥琥生拂拂生元孝
元孝生之厚之厚生浣浣生思晦

延祐七年遣王存義詣魯以太牢祀孔子設立司樂

一員

見元史

幸魯盛典云元仁宗延祐七年六月十八日中書
禮部准戶部關承中書省判送戶部呈准吏禮部
關襲封衍聖公申照得本廟別無設立樂師就選

得國子陪堂生員白惟潛充樂師本部議得合依
國子學例設司樂一員教習生員以備春秋祭祀
令司樂白惟潛於延祐六年八月十三日公叅勾
當外本人合得俸給比依國子監司樂俸例給降
相應奉都堂鈞旨付蒙古必闡赤房依例出給劄
付議得先聖祖廟旣已降登歌雅樂依准所擬設
立司樂一員比依國子監司樂出身又議得先聖
祖廟司樂白惟潛雖是劄設緣係教習生徒春秋
祭祀人員吏部照勘叅詳所索俸給依所指國子

監司樂月支俸至元鈔一十六兩六錢六分自呈
准月日爲始令濟寧路支付覆奉都堂鈞旨依例
施行除已行下濟寧路依上施行合下照驗下襲
封衍聖公府劄到奉行

英宗至治二年以國子監生孔思凱爲縣令

泰定帝泰定三年山東廉訪使王鵬南言孔思晦襲
爵上公而階止四品弗稱失尊崇意宜加陞

泰定四年陞衍聖公孔思晦嘉議大夫

以上見闕里志

文宗至順元年贈聖孫爲沂國述聖公

見元史

至順二年賜衍聖公孔思晦三品印請設尼山書院
洙泗書院山長各一員以彭璠爲山長

見闕里志

附錄虞集尼山書院記尼山書院山長臨川金谿
彭璠歸自魯以興復書院始末爲言乃爲之次第
其事云尼山去曲阜東南六十里今屬滕州鄒縣
在滕西百里鄒東六十里其山五峰並峙中峰則
所謂尼山啓聖王夫人顏氏所禱而生聖人者也
山皆石其巔多蒼栢諸小木皆巨葉霜露旣降絢
如渥丹升降各途升之谷草木之葉皆上起降之

谷草木之葉皆下垂無或交戾反刺者其東崖有石洞曰坤靈之洞中有聖人石像臨水與顏母山對其北則防山卽聖人合葬其父母處也今書院在其中前有智源之溪後有中和之壑往者奉尼山之神而祀曰毓聖侯其左有夫子之宮焉故宋慶歷癸未孔子四十六代孫襲文宣公知兗州仙源縣宗愿作新宮廟有夫子之殿有夫人之位有講堂有學舍有祭田自是歷宋金至於今蓋三百餘年矣宮不知何年廢我國家奄有中夏尚崇孔

子之道歲月寢久典禮斯備至順三年壬申立五十四代孫襲封衍聖公思晦用林管勾簡實理言請復尼山祠廟置官師奉祀因薦璠可用事聞中書送禮部議奎文閣大學士康理公夔時爲尚書力言其事當行議上至元二年丙子中書左丞王公懋德率同列執事者白丞相置尼山書院以璠爲山長三年六月至官祓舍山中罄竭私橐繼以假貸具羊豕爲酒告山之神召近鄉父老受神賜告以興廢之故明日鄉父老各以其人至遂除荆

棘撤瓦礫得殿及門之故基諸舍之所在次第而見將告諸郡縣而經營之山東東西道肅政廉訪分司寧夏楊文公言訥行部率吏翟趙郭趨茲山留璠舍一日顧瞻徘徊以其事爲已任命同知滕州事郝寶閭領之首出俸以爲之先而監州李彥博鄒縣令張士謙與郡邑之官屬暨大宗子孔克監襲曲阜令克欽宗族子孫凡齊魯之境賢卿大夫士民之好事者大出錢而勸成之擇木於山陶甃於野傭僦致遠牽車牛服力役連畛載途飲餉

相望役大而民不知勞又得古殿之遺構成材於
魯之故家尤稱巨麗不數月而大殿成殿門成毓
聖侯之祠成學宮在廟之西倣國子監制也作觀
川亭於坤靈洞之上相傳夫子之在川上蓋在此
云繼以塑繪聖賢之像成樂器祭器以次成置弟
子員以凡民之子弟俊秀者充之皆復其身役廼
以明年之上丁用太牢致祠告成噫其功可謂敏
矣夫朝廷定議於上部使者有司宣力於下以克
有成聖明在上文運宣通於斯可徵焉嗚呼古初

開物天作尼山太和網緼元氣融結流形降神篤
生大聖以立二極位天地育萬物與日月四時貫
通於無窮與夫徂徠龜蒙至於岱宗雨露風霆往
作來復前詹後際邈然高深詎可測哉運會有時
聿奠新宇不日而成豈偶然歟璠也得以學官從
事於茲日可謂榮矣集老且病舊學荒落僅克識
其梗槩如此若夫播爲聲詩歌頌功德式薦明享
勒之金石則有待於當今儒林之君子也哉○創
建洙泗書院記至元後戊寅八月益都宣慰東野

潛社稷署令蔡思中簿鄧昌壽偕五十三代孫文
學孔澈具筐幣詣元隆曰世尹聖裔也以斯道之
故聘子從遊也久謂洙泗故基爲民所有化爲禾
黍過者興歎出貲市田貿材經營量度禮殿講堂
門廡齋庖闕時告成將勒諸石以紀歲月特徵文
於子子母多讓元隆筆力僂弱辭不獲命遂記之
夫天地之運有通復日月之明有晝夜聖人之道
有否泰非聖天子則聖人之道不行微吾夫子則
帝王之道不明欽惟世祖皇帝平定區宇列聖祖

武道之大明以行焉廼詔天下郡縣廟祀夫子備
王者禮樂惟祖庭爲盛洙泗遺址斯文所基歷代
未復荒頓幾二千載矣一旦舉之實我皇元闡文
運隆治化之盛典也昔聖祖之講誨於是也刪詩
訂書贊易道修春秋道統之傳以祖述憲章上律
下襲皆鈞覆載之體寒暑之時服食之功三綱五
常賴以不墜而禮樂教化以之而可度典章文物
以之而可興修已治人之德以之而可成洪纖高
下各遂其性形容夫性與天道之妙以相授受成

就後學施諸永世傳諸方策爲天地立心爲生民
立命爲萬世開太平奚止土木之功爲或然尹之
區區者豈特其繼述之孝將以賁國家典禮之至
尊豈斯道之極誠臣子之至願也庸思其先自有
國之初其祖元用率孔族招庶姓以降尋以軍功
歿於王事之全暨治倬功祖庭其父思誠拜師命
於成均四君子者奕世象賢皆不暇及今能之匪
尹之所能爲也天也天朝文明聖治之化被四表
格上下洽之無窮故千古廢墜一時告新我朝所

以冠五帝冕三王之盛者於是乎在方其經始僉
肅政廉訪司事楊文公言訥按部至說以予之尹
之爲力也易尹名克欽字敬夫考之世譜宣聖五
十代孫也謹記○按尼山書院洙泗書院請設於
至順二年始於壬申成於戊寅也

至順三年加封聖父齊國公爲啓聖王聖母顏氏爲

啓聖王夫人加封至聖文宣王夫人

見元史

加封啓聖王詔曰闕里有家系出神明之胄尼山

請禱天啓聖人之生聿觀人文敷求往哲維孔氏

之有作集羣聖之大成原道統則堯授舜傳至周
文王論世家則契至湯下逮正考父其明德也遠
矣故生知者出焉有開必先克昌厥後如太極之
生天地鉅海之有本源雲仍旣襲於上公之封考
妣宜眎夫素王之爵於戲君子之道考而不謬建
而不悖於以敦典而敘倫宗廟之禮愛其所親敬
其所尊於以報功而崇德尚篤其慶以相斯文齊
國公叔梁紇加封爲啓聖王魯國太夫人顏氏加
封啓聖王太夫人○加封大成至聖文宣王夫人

三聖紀年十卷
三
詔曰我國家惇典禮以彌文本閨門而成教乃睠
素王之廟尚虛元嬪之封有其舉之斯爲盛矣大
成至聖文宣王妻元官氏來嬪聖室垂裕世家籩
豆出房自流風於殷禮琴瑟在御存燕樂於魯堂
功言邈若於遺聞儀範儼乎其合德作爾褱衣之
椽稱其命鼎之名噫秩秩彞倫吾欲廣關雎鵲巢
之化皇皇文治天其興河圖鳳鳥之祥可特封大
成至聖文宣王夫人

順帝元統元年以孔克欽襲縣令

順帝至元元年詔孔子五十五代孫克堅爲嘉議大夫襲封衍聖公

至元三年以谿達職爲山長

闕里志云山長初以異姓任後改孔氏子孫任

至元四年曲阜縣尹孔治請將宣聖廟奎文閣廟學

等修蓋

以上見闕里志

幸魯盛典云元順帝至元四年東平路曲阜縣尹兼主祀事孔治請將宣聖廟奎文閣廟學等修蓋奏准委官張煥與達魯花赤管民官估計合用磚

瓦木植等物價銀錢鈔五十六錠五十餘兩又於
本路曆日錢內支鈔二十錠仍委能幹人員并曲
阜尹兼主祀事孔治等起蓋奎文閣杏壇齋廳黌
舍皆卽舊而新之

至元五年詔修曲阜宣聖廟勅歐陽玄撰碑

見元史

其文曰今上皇帝臨御之七年歲在己卯春三月
戊辰御史大夫臣別里怯不花臣脫脫等言天曆
二年十月文宗皇帝在御奎章閣學士院臣沙臘
班等列奏曲阜宣聖廟自漢唐宋金凡有隳廢必

奉勅繕修功成則勒之石衍聖公以舊廟將壞飭書奉圖屬學士院以聞時文宗覽圖諭旨省臣趣修之事竣則立碑以詔方來今新廟旣完而成績未紀懼無以稱塞先詔御史章上臣等僉議請勅翰林侍講學士臣玄爲文奎章閣學士院大學士臣夔夔爲書前御史臣起巖爲篆以臺儲中統楮幣二萬五千緡爲立石之資制皆允廼命宣聖五十四代孫御史思立傳勅臣玄俾書其事玄拜手稽首言曰天佑下民作之君作之師昔者伏羲神

農黃帝堯舜禹湯文武數聖人者作君師之道備
於一人用能左右上帝克綏厥猷吾夫子出天獨
畀以師道凡天敘天秩天命天討之事夫子明禮
樂刪詩書贊易道修春秋而品節之以爲百王法
於後世儀封人曰天將以夫子爲木鐸子貢曰固
天經之將聖夫子自論斯文之任上以屬於天下
以屬於已使得位設教卽前數聖人所謂繼天立
極者也是故天欲興一代之治則吾夫子之道必
大昭明於時歷千萬世如出一轍皇元龍興朔方

太祖皇帝聖智天授經營四方太宗皇帝平金初
年歲在丁酉首詔孔元措襲封衍聖公復孔顏孟
三代子孫世世無所與增給廟戶皆復其家是歲
曆日銀諸路以其半益都東平以其全給修宣聖
廟尋詔元措括金人禮樂官師及前代典冊辭章
鐘磬等器以數來上仍命於曲阜閱習禮樂以備
時用又詔諸路設學遣官分道程試儒業世祖皇
帝初在藩邸多士景從及其卽位大召名儒廣庠
序命御史臺以勉勵校官國子監學以訓誨胄子

大司農以興舉社學興文署以板行海內書籍提
舉教授以主領外路儒生宿衛子弟咸遣入學輔
弼大臣居多俊乂內廷獻納明夫子之道者言必
稱旨 在位三十五年之間取士之法興學之條目
討論之規模益弘遠矣 裕宗皇帝時在東宮贊成
崇儒之美 成宗皇帝克繩祖武銳意文治踐祚之
初詔曰孔子之道垂憲萬世有國家者所當崇奉
旣而作新國學增廣黌舍數百區胄子教養之法
始備 武宗皇帝燭興制作加號孔子爲大成至聖

文宣王遣使闕里祀以太牢仁宗皇帝述世祖之事弘列聖之規尊五經黜百家登崇俊良以張治具我朝用儒於斯爲盛英宗皇帝鋪張鉅典廓開彌文明宗皇帝凝情經史愛禮儒士文宗皇帝緝熙聖學加號宣聖皇考爲啓聖王皇妣爲啓聖夫人改鑄衍聖公三品印章賜山東鹽運司歲課及江西浙江兩省學田歲入中統楮幣三十一萬四千四百緡昇濟寧路俾修曲阜廟庭文宗實天太祖太后有旨董其成功今上皇帝大纘丕圖儒學

之詔方頒闕里之役鼎盛山東憲司洎濟寧總管
張仲仁曲阜縣尹孔克欽蒞事共恪以元統一年
四月十一日鳩工至元二年十月初吉落成宮室
之壯以寧神棲樓閣之崇以庋寶訓周垣繚廡重
門層觀丹碧黝堊制侔王居申命詞臣揚厲丕績
於是內聖外王之道君治師道之詣大備於今時
猗歟盛哉皇元有國百餘年以來繕修宣聖廟者
再丁酉之初以開同文之運天曆之際以彰承平
之風東冒出日西踰崑崙南盡火維北際冰天聖

道王化廣大悠久相爲無窮端本實在茲矣臣立
奉命撰述有詔御史思立奉祝幣牲齋馳驛往祭
告厥成功臣立旣序顛末請系以詩詞曰厥初生
民倥侗顛蒙三五繼作大道爲公風氣日開民習
日漓道統絕續孰綱孰維少昊之墟東魯之士挺
生聖人以淑萬古聖人旣生代天以言立我民極
與天並存惟皇建極尊用其道百王軌範於以順
考三光以全寒暑以平俊民用章時乃迓衡天子
垂拱大臣承弼體信達順麟鳳時出皇元之興厚

集大命太宗興文首法元聖世祖龍飛髦士屬心
恢弘文治濬發德音世及三紀仁漸義摩建學立
師善人用多溫文裕宗祇荷詒燕成廟崇儒廸若
天顯武皇英毅入繼離明載崇徽號玉振金聲濬
哲仁皇文德繼世誕揚祖訓籲俊尊帝爰及英宗
禮樂孔殷穆穆明考美德懿聞文宗續緒聖聖克
肖廼開奎府廼飭孔廟今上嗣世丕式大猷勒石
新廟宏賁鴻休新廟奕奕泰山具瞻衡統絃綖袞
衣檐檐維宋維金遺刻具在於赫我元冠冕百代

我元聲教極彼堪輿黌舍萬里誦詩讀書惟茲曲阜斯道之壺如水有源如木有本皇監在上執我道樞相我熙朝躋民唐虞睠言臺臣職是風紀昭宣獻謨是用歸美聖道王化如日麗天儒臣詠歌億載萬年

順帝至正元年孔克堅請修祖廟帝以山東曆日錢之半給其費又賜楮幣二萬五千緡

見家譜

順帝至正五年授五十六代孫孔希學中奉大夫

至正八年授孔克堅中奉大夫賜以銀章勅呂思誠

三聖綱目 十卷
三
撰啓聖王碑

其文曰維至正八年四月上在興聖宮御宣文閣
中書右丞相朶兒只等入奏曰孔子父叔梁紇加
封啓聖王未有刊述昭示久遠請以中書右丞相
呂思誠爲文出中統鈔五千貫下襲封府具攻石
之用制若曰可臣思誠承命惶悚大恐弗任乃拜
手颺言曰惟我國家崇重聖德宣昭聖道與王化
合併太祖皇帝肇基洪業太宗皇帝在潛行釋奠
禮祀孔子於日月山世祖龍飛車書混一自上都

大都及天下郡邑立廟學曲阜林廟尤加修崇於是定襲封之祠除孔氏一人尹曲阜縣恩至渥也成宗皇帝廟於國子監武宗皇帝加謚大成於至聖文宣王上仁宗皇帝詔立碑天曆初制加封啓聖王顏氏曰啓聖王夫人曠典也今襲封衍聖公克堅旣追官中奉大夫階二品換印章爲銀爲啓聖王碑得請聖眷隆厚曷以報稱臣謹按春秋公羊氏穀梁氏依經書孔子生隨經書孔子卒史記作殷本紀帝嚳妃簡狄生契十三遷而至天乙始

有天下是爲成湯書契者原其初也微子開國亦
曰帝乙之長子明其本也孔子世家曰其先宋人
曰防叔生伯夏言有承也又書鯉以下直至漢時
復列傳諸弟子七十二人宋儒邵雍曰天子以四
海爲家孔子以萬世爲家殆以是夫惟文公朱熹
刪定世家序論語前曰魯襄公二十二年冬十一
月庚子父叔梁紇母顏氏生孔子於魯昌平鄉陬
邑又曰孔子生鯉字伯魚鯉生伋字子思作中庸
厥有旨哉夫惟玄鳥之降玉筐之覆金行啓運斗

光垂精爲五百年之昌期千萬世之嘉會者實由
天生顏淵曰仰之彌高鑽之彌堅瞻之在前忽焉
在後子貢曰立之斯立道之斯行綏之斯來動之
斯和其生也榮其死也哀子思曰仲尼祖述堯舜
憲章文武上律天時下襲水土孟軻曰自生民以
來未有盛於孔子者也賢於堯舜遠矣太史公曰
自天子王侯言六藝者折中於夫子可謂至聖矣
揚雄曰天之道不在仲尼乎文中子曰大哉乎君
君臣臣父父子子兄兄弟弟夫夫婦婦夫子之力

也其與太極合德神道並行乎韓愈曰社稷以功
夫子以德程子謂賢於堯舜者以事功蓋金聲玉
振集羣聖之大成實由天縱若夫尼山請禱精誠
昭揭而其表相殊異曰似堯曰似湯曰似禹曰似
子產曰河目海口黃帝之形貌也曰修肱而龜背
成湯之容體也惟此身體髮膚之所從毓靈誕聖
之所自不在茲乎漢時聖舅顏氏居魯親里聖妃
丕官氏居安樂里復其繇發宋時有齊國公之封
又有魯國太夫人鄆國夫人之號其爵邑又若不

自其子者今茲峻其徽章名與情稱百世不能改也於戲盛哉伏惟聖人人倫之至也繫周易刪詩書定禮樂垂憲萬世師表百王者蔑有加矣獨於春秋曰志在焉孝經曰行在焉春秋天子之事也三綱九法望於周也故曰如有用我者吾其爲東周乎孝經開五孝之用自天子至於庶人各有終始其曰至德要道其曰天經地義其尊親之心顯親之念曾子所謂一貫孟子所謂一本也不然是悖德悖禮矣洪惟今上皇帝接太祖皇帝世祖皇

帝之聖緒嗣守列聖以來之成規聖治之敷孝治
之洽所謂通於神明光於四海者於春秋孝經有
嘉焉碑之闕里光昭休烈於無窮若江漢之濯秋
陽之暴皜皜乎不可尚也臣思誠頓首誠惶誠恐
復獻頌曰於鑠皇元赫赫明明翕闢乾坤資始資
生太祖肇基風霆流行世祖混一覆載生成列聖
嗣服時靡有爭今上繼緒品式法程聖治丕顯孝
治丕平嘉崇孔子縟典鴻名尼山有禱斗光垂精
表相之異至道之凝曰惟天縱玉振金聲孰與道

生本立枝承王爵之崇啓聖之榮義符於情名與
實徵五父之殯緩乎其行防墓之崩泣然涕零志
在春秋行在孝經愛親敬長春秋權衡尊親顯親
五孝重輕今茲有茲誕聖毓靈子孫有衍是服是
膺尼山崢嶸泗水不盈蔚彼孔林卓彼魯庭有豐
斯碑光昭日星同我夫子無忝所生闡我皇風四
海永清

至正十二年以從仕郎孔希大襲縣令

以上見
關里志

至正十五年徵孔克堅爲同知太常禮儀院事攝太

常卿拜治書侍御史

至正十九年遷衍聖公孔克堅禮部尚書出爲西臺

侍御史召拜國子祭酒

以上見思晦傳

至正二十二年除孔克堅國子祭酒謝病歸起集賢

學士及山東廉訪使皆不就

見家譜

至正二十三年授孔希章從仕郎曲阜縣令

見闕里志

至聖編年世紀卷之二十一終

至聖編年世紀卷之二十二

婁東嘉定李

灼松亭

全輯

新安古歛黃

晟曉峰

男李

肯堂德紹

思堡守臣全校

男黃為葵筠圃

明

按明太祖於元順帝至正十六年稱吳公一年

至正十六年九月戊寅太祖如鎮江謁孔子廟

至正二十二年春正月乙卯太祖如龍興改為洪都

三聖統年十系
府謁孔子廟

以上見文廟祀典

太祖洪武元年二月丁未以太牢祀先師孔子於國

學

見明史本紀

闕里志云駕幸太學行釋奠禮詔封爵仍舊孔氏衣巾俱如歷代舊制免孔氏子孫差遣祭酒孔克堅致祭闕里賜孔子五十六代孫希學雜綵六端卽命回守祖庭十二月授資善大夫襲封衍聖公改故元縣尹孔希大爲承事郎曲阜尹設孔顏孟三氏子孫教授一員致祭闕里勅諭曰仲尼之道

廣大悠久與天地相並故後世有天下者莫不致
敬盡禮修其禮事朕今爲天下主期在明教化以
行先聖之道今旣釋奠於國學仍遣爾修祀事於
闕里爾其敬之○封孔希學爲襲封衍聖公制曰
古之聖人自羲農至於文武法天治民明並日月
德化之盛莫有加焉然皆隨時制宜世有因革至
於孔子雖不得位會前聖之道而通之以垂教萬
世爲帝者師其孫子思又能傳述而明言之以極
其盛有國家者求其統緒尊其爵號蓋所以崇德

而報功也歷代以來膺襲封者或不能繩其祖武
朕甚憫焉當臨御之初訪其世襲者得其五十六
代孫孔希學大宗是紹爰行典禮以致褒崇爾其
勤敏以進學恭儉以成德庶幾領袖世儒益展聖
道之用於當世以副朕之至意豈不偉歟○明祭
祀考云洪武元年八月遣官釋奠於先師孔子遂
定制每歲仲春仲秋上丁日遣官祀大成至聖文
宣王於國學以丞相初獻翰林學士亞獻國子祭
酒終獻前期皇帝齋戒獻官陪祀官執事官皆散

齋二日致齋一日前祀一日皇帝服皮弁服御奉
天殿降香至日獻官行事○闕里志云洪武元年
十一月十四日祭酒孔克堅召對謹身殿上曰老
秀才近前來你多少年紀也對曰五十三歲上曰
我看你是有福快活的人不委付公事勾當你常
常寫書與你的孩兒我看他資質也溫厚是成家
的人你祖宗留下三綱五常垂憲萬世的好法度
你家裏不讀書是不守你祖宗法度如何中你老
也常寫書教訓者休怠惰了於我朝裏你家裏再

出個好人可不好是月二十日孔克堅於謹身殿
西頭廊房下奏曲阜進表的回去臣將主上十四
日誠諭的聖旨備細寫將去了上曰道與少喫酒
多讀書○孔克堅謝病歸有明定鼎太祖屢詔促
入覲待以賓禮而不名賜廩祿慰勞甚至郊社必
致膳肉○孔希學朝謁行在太祖問民利病希學
條對有序上甚嘉納賜雜綵六端命回守祖庭歲
入覲始至中使慰勞賜予稠疊館餽至僕隸勅禮
部用意禮待歲旦朝賀班亞上相

洪武二年遣使致祭闕里置祭田二千頃撥民間俊秀以供本廟洒掃

見明史

闕里志云欽賜孔廟祭田五屯地共計二千大頃原開荒七百二十步成畝坐落竟屬二十七處撥民間無過俊秀五百戶湊人二千丁見丁百畝佃種鄆城鉅野平陽東河獨山五屯辦納籽粒以供本廟祀事正項支用外四氏學教官俸祿及屬官各役工食又撥民間俊秀子弟一百一十五戶以供本廟洒掃○孔貞棟曰此我國家崇祀之始當

皇祖正位宸極之初頒下民詔與民更新乃首舉
闕里之祀及太學釋奠之禮蓋知我夫子之道由
之則治舍之則亂故崇儒重道之典汲汲於干戈
甫定之日大聖人作爲超出尋常萬萬矣開萬世
太平之業實基於此云

洪武三年詔孔子封爵宜仍其舊孔克堅以疾告遣
中使存問日再至疾篤詔驛傳還家賜白金百兩雜
綵十端錢物稱是

附錄少保吏部尚書兼華蓋殿大學士李賢等查

得洪武三年六月初三日欽奉太祖高皇帝詔曰
夫禮所以明神人正名分不可以僭差今命依古
定制凡嶽鎮海瀆並去其前代所封之號止以山
川本名稱其神郡縣城隍神號一體改正歷代忠
臣烈士亦以當時初封以爲實號後世溢美之稱
皆與革去其孔子善明先王之道爲天下師以濟
後世非有功於一方一時者可比所有封爵宜仍
其舊庶幾神人之際名正言順於理爲當用稱朕
以禮祀神之意欽此欽此

洪武四年更定釋奠孔子祭器禮物擇監生及文武大臣子弟在學者預教習樂舞詔封爵仍舊

以上見闕里志

闕里志云孔子之祀像設高座而器物陳於座下弗稱其儀其來已久至是定擬各爲高案其豆籩簠簋悉代以磁器○邱濬曰宋蘇軾謂古者坐於席故籩豆之長短適與人均今土木之像旣已巍然於上而列器皿於地使鬼不享則不可知若其享之則是俯伏匍匐而就食也由是觀之則孔子廟自唐設塑像以來已如此歷宋至元未之有改

至是皇祖始正之云

洪武五年文廟成太祖視學釋菜

見孔庭纂要

洪武六年八月上御端門召衍聖公孔希學問對

見闕

里志

幸魯盛典云洪武六年八月二十七日上御端門
百官早朝上召衍聖公孔希學問曰爾年幾何對
曰臣今年三十有九上曰今去爾祖孔子歷年幾
何對曰僅二千上曰年代雖遠而人尊敬如一日
者何也惟爾祖明綱常興禮樂正彝倫所以爲帝

者師爲常人教傳至萬世其道不可廢也且爾祖
無所不學無所不通故得爲聖人如問禮於老聃
學琴於師襄之類此謂學無常師非特如此楚王
渡江得一物其大如斗其赤如日其甜如蜜皆不
知遣使問於爾祖爾祖曰此萍實也問何以知之
爾祖曰昔我聞諸童謡云童子之言爾祖尚記之
不忘况道德之奧者乎今爾爲襲封爵至上公不
爲不榮矣此非爾祖之遺蔭歟朕以爾孔子之裔
不欲以流內銓注以政事煩爾正爲保全爾家也

爾若不讀書辜朕意矣且人生年自八歲至弱冠
多昏蒙未開不肯向學自冠至壯年有室血氣正
盛百爲營營亦無暇好學爾年近四十志慮漸凝
定見識漸老成正好讀聖人之書親近名師良友
蚤夜講明道義必期有成學成之後四方之人知
爾之能俱來執經問難且曰此無媿孔氏子孫豈
不美與然四體之動乃德之符步履進退亦必用
安詳不可欹斜飛舞久久習熟遂爲端人正士朕
今婉曲教爾爾其自繹還家亦以此教子孫可也

三聖統志卷之十
勉之哉勉之哉

洪武七年二月戊午修曲阜孔子廟設孔顏孟三氏

學

見明史本紀

幸魯盛典云洪武七年二月二十二日禮部尚書給事御史等官於奉天門東板房奏衍聖公公合設官屬孔顏孟三氏子孫教授一員學錄一員屬官管勾一員典籍一員司樂一員又掌書一名書寫一名奏差一名知印一名學司一名尼山洙泗二處各設教諭一員奉旨您寫出漢唐宋待孔氏子

孫典故將來我就定奪將去本月二十四日各官
於武英殿將漢唐宋待孔氏子孫典故進奏議得
衍聖公府屬內掌書一名前元照依六部令史月
給祿米二石俸鈔一百二十五兩典吏知印奏差
共三名俱係創設屬官典籍管勾司樂三員各給
月米一石俸鈔八十兩元設孔顏孟三氏子孫教
授學錄並洙泗尼山書院設立教諭等四員上項
教官止於瞻學田內所收籽粒養瞻奉旨孔顏孟
三氏教授其餘所屬官吏着衍聖公孔希學保舉

來准用月俸就於免糧田內自行量撥○闕里志
云洪武七年十一月十一日奉禮部資填內府湯
字三十二號勘合爲釋奠事內開宣聖廟四時祭
祀合用樂舞生於府州縣儒學生員內遴選或於
民間俊秀子弟內選用備行准取到濟寧曲阜等
州縣樂舞生張濤等一百二十餘名內將二十名
起送太常寺協律郎處習演樂舞熟嫻欽賜寶鈔
發回在廟應充前役俱照廩膳生員事例除本身
優免外仍免本人戶二丁又以孔克伸爲世職知

縣又造送宣聖廟樂器祭器法服各給一副禮生止許於曲阜縣十六社內選用隨選到陳慶等六十名應役其優免供丁事例俱同樂舞生

洪武十年詔襲封衍聖公每年來走一遭孔廟樂舞生衣冠官府做與他并做籥翟應鼓等項

洪武十一年十二月勅衍聖公孔希學

幸魯盛典云洪武十一年諭孔希學曰昔卿之祖能明綱常以植世教其功大矣哉故其後世子孫相承凡有天下者莫不優禮今卿每歲來朝不避

三聖續金 十
嚴凍可謂篤於君臣之大義而不拂於祖訓者矣
已勅中書下禮部賜卿日用故茲勅諭

洪武十二年諭衍聖公孔希學

幸魯盛典云洪武十二年諭衍聖公孔希學曰卿
家昭明歷代不朽富貴永張天地間乃由陰隲之
重云何以其明彝倫攸敘之精表萬世綱常於不
泯也故若如卿當思祖道可動人天朕聞卿來朝
已勅中書下禮部使所用如意未知給否雖從行
者務要懽心故茲勅諭

洪武十四年建太學於南京定文廟之制自孔子以

下盡去塑像用木主

以上見闕里志

朱子語錄曰宣聖本不當設像春秋祭時只設木主祭可也邱濬曰臣按塑像之設中國無之至佛教入中國始有也彼異教用之無足怪者後世莫覺其非亦化於異教爲之甚非神而明之無聲無臭之道也我皇祖毅然灼見千古之非自夫子以下像不塑繪祀以神主數百年異教乃革

洪武十五年四月丙戌詔天下通祀孔子

見明史本紀

明通紀云洪武十五年太學成五月十一祀先師以太牢十七日帝詣廟視學釋菜令諸儒議禮議者曰孔子雖聖人臣也禮宜一奠再拜朕以爲聖如孔子豈可以職位論哉服皮弁再拜獻爵復再拜學官率諸生進拜堂下博士執經祭酒講經畢頒勅諭太學生徒以孔克繡爲曲阜縣知縣○明紀云江南國學之趾在覆舟山陽晉宋以來戰塲積屍所也每陰雨行人多爲鬼眩有至死者因創鷄鳴寺設譙度之不止馬后言於太祖謂邪不勝

正非孔子大聖無以鎮之卽日遷大成木主於此
鬼乃不復爲祟因建國子監學旣成氣象鴻偉下
令敢有婦女入廟者斬趾蓋欲絕陰類也馬后聞
其壯麗欲往觀焉上不可乃於鷄鳴山東麓緣岸
開道俾后自上望之至今石磴猶存立法甚嚴有
誹謗師長者梟○孔庭纂要云洪武初改建國學
於鷄鳴山下卽六代樂游苑分爲二東則小校場
西則學基學舍隙地種菜佐飲食之用

洪武十六年詔孔子五十七代孫訥入覲賜膳光祿

寺命禮官館於太學賜衣服鈔錠充牝館舍

闕里志云訥字言伯篤學恭謹能詩書工篆法洪武十六年丁父憂以馬后喪赴京祭孝陵既竣事入覲太祖顧謂廷臣曰孔訥真聖人子孫也賜膳光祿命禮官館於太學遣尚書劉仲贊勞問日繼庖廩復賜衣服鈔錠充牝館舍將俾襲爵以居喪乃止

洪武十七年正月以孔訥襲封衍聖公勅每月朔望太學祭酒以下行釋菜禮郡縣學長吏以下詣學行

香以孔希文爲曲阜縣令

闕里志云洪武十七年正月孔訥朝京師二月二日拜襲封之命受誥大廷百僚班列仍勅禮官以教坊樂導至太學學官率諸生二千餘人迎於成賢街明日入謝復賜襲衣宴於禮部誥詞吏部奏用資善階上諭曰旣爵公勿事散官但誥以織文玉軸爲異耳遂爲故事○邱濬曰朔望行香之初古未有也北齊每月朔祭酒博士諸生展拜堦下郡縣朔朝末燕今所謂香也至宋淳化四年始朔

三聖統全 十卷
望行香朱子曰謁先聖焚香非古也至我朝始定
爲朔望焚香徧海內矣

洪武二十六年詔定文廟祭祀設高案頒大成樂器
於天下令如式製造舞用三十六人

幸魯盛典云大成樂器其制楹鼓一執事一人編
鍾一執事八人編磬一執事八人壎二篪二執事
共四人鳳簫二執事二人笛笙簫各執事六人琴
六瑟二執事共八人歌六人搏拊二祝一敔一麾
一共五人舞三十六人

洪武二十八年以孔希範爲曲阜縣令

洪武二十九年諭工部引工匠赴闕里修理聖廟

幸魯盛典云二十九年諭工部侍郎秦達闕里先
聖降神之地廟宇廢而不修何以妥神靈昭來世
爾工部卽爲修理以副朕懷遂差行人張敏引工
匠千人修葺一新

洪武三十三年詔孔子五十八代孫公鑑襲封衍聖

公

以上見
闕里志

闕里志云公鑑字昭文生而岐嶷長益端謹洪武

惠宗建文元年三月釋奠於先師孔子

成祖永樂四年三月辛卯釋奠於先師孔子

以上見明史本

成祖實錄云永樂四年三月帝將視學命禮部詳

議禮儀尚書鄭賜言宋制謁孔子服靴袍再拜成

祖曰見先師禮不可簡必服皮弁行四拜禮謁廟

禮畢幸太學賜祭酒司業坐講文武三品以上及

翰林儒臣皆賜坐聽講○明視學儀考云永樂四年祭酒胡儼講尚書堯典司業張智講易泰卦畢命光祿寺賜百官茶禮部請立視學之碑帝親製文勒石

永樂六年駕至北京經過處所遣官祭闕里

見明會典

永樂八年十二月詔孔子五十九代孫彥縉襲封衍聖公

闕里志云彥縉字朝紳其名與字皆仁宗所命也早孤母教育之永樂八年十二月襲封衍聖公太

三聖紀卷十
宗觀其言動進退從容喜謂侍臣曰真聖人之裔也館之太學禮待甚厚

永樂九年以孔克中爲曲阜令

永樂十三年十二月着山東布政司官一員與曲阜

縣知縣孔克中典役修理孔廟

永樂十四年遣官祭闕里

以上見闕里志

永樂十五年九月丁卯曲阜孔子廟成帝親製文勒

石

見明史本紀

幸魯盛典云明成祖永樂十五年五月修理孔廟

畢工衍聖公孔彥縉率知縣孔克中及族人等奏
謝命頒膳於光祿復賜宴於禮部仍命衍聖公孔
彥縉知縣孔克中上殿面對○御制孔子廟碑文
曰道原於天而畀於聖人聖人者繼天立極而統
承乎斯道者也若伏羲神農黃帝堯舜禹湯文武
周公歷聖相傳一道而已周公沒又五百餘年而
生孔子所以繼往聖開來學其功賢於堯舜故曰
自生民以來未有盛於孔子者也夫四時流行化
生萬物而高下散殊咸遂其性者天之道也孔子

參天地贊化育明王道正彝倫使君君臣臣父父子子夫夫婦婦各得以盡其分與天道誠無間焉爾故其徒曰夫子之不可及也猶天之不可階而升也又曰仲尼日月也無得而踰焉在當時之論如此亘萬世無敢有異辭焉於乎此孔子之道所以爲盛也天下後世之蒙其澤者實與天地同其久遠矣自孔子沒於今千八百餘年其間道之隆替與時陟降遇大有爲之君克表章之則其政治有足稱者若漢唐宋致治之君可見矣朕皇考太

祖高皇帝天命聖智爲天下君武功告成卽興文
教大明孔子之道自京師以達天下並建廟學徧
賜經籍作養士類儀文之備超乎往昔封孔氏子
孫世襲衍聖公秩視一品世擇一人爲曲阜令立
學官以教孔顏孟三氏子孫嘗幸太學釋奠孔子
竭其嚴敬尊崇孔子之道未有如斯之盛者也朕
纘承大統丕法成憲尚惟孔子之道皇考之所以
表章之者若此其可忽乎乃曲阜闕里在焉道統
之系實由於茲而廟宇歷久漸見墮敝弗稱瞻仰

往命有司撤其舊而新之今年畢工宏邃壯觀庶
稱敬仰之意俾凡觀於斯者有所興起致力於聖
賢之學敦其本而去其末將見天下之士皆有可
用之材以贊輔太平悠久之治以震耀孔子之道
朕於是乎有深望焉遂書勒碑樹之於廟并系以
詩曰巍巍元聖古今之師垂世立言生民是資天
將木鐸以教是畀謂欲無言示之者至惟天爲高
惟道與參惟地爲厚惟德與含生民以來實曰未
有出類拔萃難乎先後示則不遠日用攸趨敦敘

有彝遵於聖模仰惟皇考聖道實崇禮樂治平身
底厥功曰予祇述詎敢或懈聖緒丕承儀憲永賴
巖巖泰山魯邦所瞻新廟奕奕飭祀有嚴鼓鍾喤
喤璆磬戛擊八音相宣聖情怡懌作我士類世有
才賢佐我大明於斯萬年

仁宗洪熙元年賜衍聖公孔彥縉第於東安門北召
見孔諤命送國子監肄業旋授左春坊左中允著教
皇子諸王賜宅一區及器皿諸物

幸魯盛典云孔諤永樂六年舉人明年會試副榜

第一時太宗行在北京仁宗以太子監國事謂近
臣曰我朝孔子子孫未有出仕者今有此一人何
不取進士對曰考試至公雖父子不容私吏部欲
除諤教官仁宗召見曰孔諤少年偉俊務著中進
士命冠帶送國子監肄業未幾左春坊左中允員
缺仁宗顧謂東宮官曰春坊中允幾品對曰正六
品曰著孔諤做教皇子諸王賜宅一區及器皿諸
物諤嚴正不阿後轉大理評事改監察御史

宣宗宣德元年遣太常寺寺丞孔克準詣闕里祭告

自先師而下四配十哲兩廡凡九壇俱用太牢以孔克宴任三氏學錄兼族長

宣德元年以孔公鏜爲曲阜令

英宗正統元年遣國子監司業趙琬詣闕里祭告

正統三年禁祀孔子於釋老宮

以上見闕里志

正統九年三月辛亥朔新建太學成釋奠於先師孔

子

見明史本紀

英宗實錄云正統九年帝幸國子監如常儀宣制曰宣聖之道萬世所宗在爾師生理當修進臻於

三聖編年十紀
至極尚其勉之禮畢賜公侯伯駙馬武官都督以
上文官三品以上翰林學士至檢討國子監祭酒
至學錄宴

代宗景泰元年遣翰林院侍講吳節以香帛詣闕里
祭告召見孔子六十一代孫弘緒以孔謨爲曲阜令
幸魯盛典云孔弘緒年八歲景帝遣使驛召之陞
見之日賜官服於東角門俾襲封爵弘緒進止應
對如成人帝見其垂髫命中官卽廡下賜膳使歸
遺母又賜玉帶以其軀小去二銖授之又賜金圖

書印其文曰謹禮崇德念引緒穉幼勅戒族人共
保護之如有恃強挾長以陵害者許具實以聞令
懸之公堂永爲法守命吏部特簡教授一員誨之

景泰二年二月辛未釋奠於先師孔子

見明史
本紀

闕里志云景泰二年上幸學特召率三氏子孫觀
禮遣內官金英傳旨衍聖公來朝與正一品衣服
一套鈔二千貫下程羊酒永依此例又賜三氏子
孫冠帶錦衣視學陪祀賜孔彥縉三臺銀印玉帶
織金麒麟服

景泰三年五月命禮部取顏孟二氏子孫長而賢者各一人至京官之

見景泰實錄

景泰六年贈孔子六十代孫承慶襲封衍聖公十二月十三日詔孔弘緒襲封衍聖公以孔論任學錄按承慶孔子六十代孫也未襲爵而卒於六年贈封弘緒八歲卽襲封焉

英宗天順元年遣工科給事中孫昱詣闕里祭告召見孔弘緒於便殿親握其手置膝上與語久之賜白金綵帛大第從祀郊壇亦與分獻

明通紀云天順元年置先聖像於文淵閣設一龕
像乃銅範飾金自是閣臣每晨入必先行四拜禮
天順五年以孔公錫爲曲阜令

天順七年授孔公恂少詹事教皇子

幸魯盛典云孔公恂景泰朝進士比殿試聞母疾
遂不入上知之問禮臣孔公恂何爲不入對禮臣
具實以聞上曰聞疾未有訃音可召入對遣錦衣
賫金牌召之比入日已晡矣試卷弗及備命禮官
賜以紙筆恂條對詳明賜進士出身服闋擢禮科

給事中天順癸未東宮缺左右詹事員上遂以孔
公恂司馬恂超授少詹事拜命之日上入宮謂孝
肅皇后曰朕爲爾子得二好先生爾知喜乎后問
爲誰上曰孔公恂聖人之後也司馬恂賢人之後
也二人故家後裔且有才名斯授之耳后歛容謝
歡宴樂作夜分始罷中貴喧傳以爲太平美事公
恂在東宮講明聖學開陳善道輔導有成凡三入
詹事稱名臣焉

天順八年詔巡撫山東都察院左都御史賈銓重修

闕里聖廟以孔克旻任學錄

以上見闕里志

憲宗成化元年三月丁巳釋奠於先師孔子

見明史本紀

闕里志云成化元年遣吏部右侍郎尹旻詣闕里祭告取衍聖公孔弘緒并三氏子孫赴京觀禮又命分獻此遣官欽取之始

成化三年以孔克昫任學錄兼族長

成化四年御製重修孔子廟碑

碑文曰朕惟孔子之道天下不可一日無焉何也有孔子之道則綱常正而倫理明萬物各得其所

矣不然則異端橫起邪說紛作綱常何自而正倫
理何自而明天下萬物又豈能各得其所哉是以
生民之休戚係焉國家之治亂關焉有天下者誠
不可一日無孔子之道也蓋孔子之道卽堯舜禹
湯文武之道載於六經者是也孔子則從而明之
以詔後世耳故曰天將以夫子爲木鐸使天不生
孔子則堯舜禹湯文武之道後世何從而知之將
必昏昏冥冥無異於夢中所謂萬古如長夜也由
此觀之則天生孔子實所以爲天地立心爲生民

立命爲往聖繼絕學爲萬世開太平者也其功用之大不但同乎天地而已噫盛矣哉誠生民以來之所未有者宜乎弟子形容其聖不一而足至於中庸一書而發明之無餘蘊矣自孔子以後有天下者無慮十餘代其君雖有賢否智愚之不同孰不賴孔子之道以爲治其尊崇之禮愈久而愈彰愈遠而愈盛觀於漢魏以來褒贈加封可見矣迨我祖宗益興學校隆祀典自京師以達於天下郡邑無處無之而在闕里者尤加之意焉故太祖高

皇帝登極之初卽遣官致祭爲文以著其盛而立碑焉太宗文皇帝重修廟宇而一新之亦爲文以紀其實而立碑焉朕嗣位之日躬詣太學釋奠孔子復因闕里之廟歲久漸敝而重修之至是畢工有司以聞深慰朕懷嗚呼孔子之道之在天下如布帛菽粟民生日用不可暫闕其深仁厚澤所以流被於天下後世者信無窮也爲生民之主者將何以報之哉故新其廟貌而尊崇之尊崇之者豈徒然哉異其道之存焉爾使孔子之道常存而不

民則綱常無不正倫理無不明而萬物亦無有不
得其所者行將措斯世於雍熙太和之域而無異
於唐虞三代之盛也久安長治之術端在於斯用
是爲文勒石樹於廟庭以昭我朝崇儒重道之意
焉系以詩曰天生孔子縱之爲聖生知安行仁義
中正師道興起從游三千往聖是繼道統流傳六
經旣明以詔後世三綱五常昭然不替道德高厚
教化無窮人極斯立天地同功生民以來卓乎獨
盛允集大成實天所命有天下者是尊是崇曰惟

三聖統年世系
聖道曷敢弗宗顧予渺躬承此大業惟聖之謨於
心乃愜用之爲治以康兆民聖澤流被萬世聿新
報典之隆尤在闕里廟宇巍巍於茲重美文諸貞
石以光於前木鐸遺響餘千萬年

成化六年五月以孔弘泰權襲封衍聖公

闕里志云弘泰字以和成化六年五月十一日以
姪尚在襁褓繼兄襲封衍聖公○幸魯盛典云孔
弘泰入朝憲宗見所佩玉帶遣人問焉泰對曰臣
家門故事累朝恩數不敢廢也再值郊壇上親定

命爲分獻及辭歸上曰卿其進學循禮表率宗族
無忝聖裔以副朕懷

成化八年以孔燮爲曲阜令

成化十三年增孔子廟籩豆樂舞之數遣翰林院學
士王獻詣闕里祭告以孔公璜任學錄

闕里志云國子監祭酒周洪謨等題臣以爲孔子
之道不外乎禮樂今欲體孔子之道亦莫先乎禮
樂若不能備其禮樂則無以將其誠敬報本之義
旣踈體道之功安在臣今查得唐開元中封孔子

爲文宣王被衣袞冕樂用宮懸宮懸天子之樂也
樂旣用天子之宮懸服必用天子之袞冕然而冕
服旣用天子之禮而佾舞則用諸侯之樂以禮論
樂則樂不備以樂論禮則禮爲僭禮禮旣不明樂
又不稱孔子在天之靈必所不享則增其器數合
無將十籩十豆增爲十二籩十二豆六佾之舞增
爲八佾之舞器數旣加則佾舞與冕服相稱而樂
不爲缺矣禮明樂備則可以格神靈可以厚風化
可以補前代缺略之典可以備聖朝尊崇之制誠

爲便益緣係建言文廟禮樂事理未敢擅便題奏
奉旨尊崇孔子之道是朝廷盛典准他奏籩豆增
爲十二六佾增爲八佾通行天下該衙門知道欽
此

成化十九年衍聖公孔弘泰請復修廣聖廟乃命方
面官督營造之役

成化二十三年以孔希永爲曲阜令

以上見
闕里志

孝宗弘治元年三月癸酉釋奠於先師孔子

見明史
本紀

闕里志云孝宗皇帝登極遣太常寺少卿田景賢

詣闕里祭告駕幸學吏部尚書王恕題皇上於今年三月初三日幸太學釋奠先師孔子以臣爲分獻東哲官榮幸莫大焉竊觀儀注分獻官始終不拜聖上拜陪祭官俱拜獨分獻官始終不拜禮也臣愚以爲分獻官拜位當在殿陛之下列在陪祭官之前上在殿陛上拜分獻官陪祭官俱在殿陛下拜似爲近禮臣讀禮記文王世子篇曰凡始立學者必釋奠於先聖先師及行事必以幣此言立學事重故釋奠必以幣今皇上嗣登大寶初

幸太學卽所謂始立學也臣愚以爲釋奠當用幣
爵亦當三獻今儀注內無獻幣之禮似爲未安或
以爲舊儀注如此臣以爲舊儀注是當從之或有
差誤亦當更之以求合乎宜似不可以訛承訛也
如蒙乞下臣言於禮官會同翰林院官議之然後
行事則聖明幸學釋奠之禮庶幾合乎宜而可傳
之於後矣禮部等衙門會議奏奉聖旨分獻官拜
禮准行其餘只照舊欽此且臣言用幣者是據禮
經而言非無稽之言也釋奠之禮旣用牲用樂而

獨不用幣既行分獻禮而於先師孔子前止獻一爵豈非缺典且祀先農奠幣行三獻禮行各衙門官齋戒太常寺光祿寺又奏省牲而釋奠之禮既不齋戒又不奏省牲何其詳略之不一如此蓋亦未之思也今陛下釋奠先師體此祀先農之禮而行之似不爲過異日載諸史冊傳之千萬世豈不爲盛美之事哉如蒙乞勅禮部集議明白奏請定奪而行之以成萬世不刊之典不勝幸甚等因具奏奉旨這本禮部便會詹事府國子監翰林院春

坊官詳議來說欽此臣等謹按禮記釋奠於先聖
先師及行事必以幣於是行釋奠之事必奠幣爲
禮也然三代之禮無所於考漢祀孔子未行釋奠
唐制天子北面跪祭周廣順二年車駕幸曲阜始
拜奠祠前宋大中祥符元年幸曲阜謁文宣王廟
始靴袍再拜迨至我朝成化元年始加牲用樂雖
極尊崇之意然旣非釋奠之正又非釋奠之全卒
致紛紛此所謂有其舉之莫之敢廢者矣今主恕
所言欲行奠帛三獻之禮須讀祝飲福受胙始爲

全備原無舊典其欲比依先農之祀又係大明集
禮所載洪武舊制難以擅改合無聖駕幸學之前
致齋一日至期加帛一段樂設而不作餘仍其舊
庶免紛更等因具題奉旨是尊先師當以禮旣成
化初年有所舉只孔子前加幣用太牢改分獻爲
分奠其餘儀物俱照永樂年例行欽此遣官取衍
聖公并三氏子孫觀禮命衍聖公分奠禮畢各賞
紵絲衣一套又賜宴於禮部欽賞賜宴照前例

弘治二年以孔彥士爲曲阜令

弘治十一年百石卒史准於洒掃尸才德兼優者委

用

以上見闕里志

弘治十二年廟災遣侍讀學士李傑詣闕里祭告

見明

通紀

弘治十六年詔孔子六十二代孫聞韶襲封衍聖公

以衍聖公次子聞禮襲翰林院五經博士奉子思子

書院祀事

見闕里志

幸魯盛典云孔聞韶襲爵方弱冠陞見儀度秀整

稱上意面賜玉帶麒麟服兼賜制誥曰爾聞韶儒

宗正嫡嗣膺封命茂年美質足紹前休爾尚克勤
進修永終令譽以副四方之觀禮以光百代之宗
祀

弘治十七年閏三月辛酉闕里先師廟成遣大學士

李東陽祭告

見明史
本紀

幸魯盛典云重建聖廟大學士李東陽疏請刻御
製碑曰先該山東巡撫徐源奏闕里孔子廟修建
落成續該禮部題請御製碑文及遣官祭告奉旨
是遣李東陽祭告臣竊惟修建孔廟朝廷重事而

御製碑文及遣祭祝文尤陛下隆師重道之盛心
是宜刻之金石以昭示萬世但本廟僻在一方恐
無善寫楷書之人不能揚勵宸章有辜恩典臣奉
將使命事體相關乞令制勅房中書舍人喬宗賁
捧前項御製文字往彼書寫上石仍乞帶領工部
文思院副使閻傑就彼鐫刻事畢之日卽令回京
該部通行照例應付廩給腳力制曰可○御製碑
文曰朕惟古之聖賢功德及天下後世立廟以祀
者多矣然內而京師外而郡邑及其故鄉靡不有

廟自天子至郡邑長吏通得祀之而致其嚴且敬
則惟孔子爲然蓋孔子天縱之聖生當周季聖賢
道否之日而不得位以行乃歷考上古以來聖人
之君天下者曰堯曰舜曰禹湯文武已行之迹并
其至言要論定爲六經以垂法後世自是凡有天
下之君遵之則治違之則否蓋有不能易者真萬
世帝王之師也故自漢祖過魯之後多爲之立廟
沿及唐宋英明願治之君屢作益尊而信之孔子
之廟遂徧天下爵號王公禮視諸侯而加隆焉蓋

天理民彝之在人不能自泯也我皇祖以至神
大聖植綱常於淪斁之餘武功方戢卽遣人詣闕
里祀孔子風示天下規度可謂宏遠矣列聖相傳
益嚴祀事先後一軌暨我皇考憲宗詔增廟之舞
佾爲八籩豆十二禮樂盡同於天子褒崇之典至
是蓋無以加我國家百有餘年之太平端有自哉
闕里有廟建自前代規制尤盛弘治己未六月燬
於火朕聞之惕然特勅山東巡撫巡按暨布政按
察司官聚財庀工爲之重建越五年甲子正月工

畢巡撫右都御史徐源巡按監察御史陳璘以其
狀來上宏深壯麗視舊規有加朕懷乃慰旣遣內
閣輔臣太子太保戶部尚書兼謹身殿大學士李
東陽往告復具顛末爲文俾勒之廟用昭我祖宗
以來尊師重道之意并繫之詩曰聖人之生天豈
偶然命之大君俾贊化權二帝三王君焉克聖繼
天立極道形於政大化旣洽至治斯成巍巍蕩蕩
渾乎難名周政不綱道隨時墜孔子聖人而不得
位乃稽羣聖乃定六經萬世之師於焉足徵自漢

而下數千餘歲褒典代加有隆無替於皇我祖居
正體元六經是師卓爾化原列聖相承先後一揆
逮及朕躬思弘前軌廟貌載崇祀事孔禋經言典
訓彌謹彌敦俗化治成日升川至斯道之先允垂
萬世○弘治十七年五月重建孔廟成衍聖公孔
聞韶上表奏謝曰伏以文教誕敷離照普臨於海
宇儒宗大慶鼎新復見於宮牆誠千載之偉觀匪
一家之私幸光覃鄒魯遠邁金元茲蓋伏遇陛下
體備中和志兼謨烈乾綱獨運闢四門以廣忠言

渙號孔揚奉兩宮而隆孝治登延耆俊屏斥異端
講籍田之禮以厚民生却貢獻之私而恢邦計加
崇釋奠重師表百王之功常御經筵究刪述六經
之旨當廟宇落成之日應治元初紀之期載念先
皇舉斯盛典屢勤大吏督彼羣工出官帑以佐經
營發役人以充輸作禮庭中起視昔有加寢殿相
高於文斯稱像設儼衣冠之肅歲時增俎豆之輝
文皇遠映乎奎壁化雨再沾於洙泗總賴乾坤之
力致茲輪奐之休臣爵與上公身叨主祀孔林無

恙企聞詩聞禮之風闕里有嚴愧肯構肯堂之業
侍虞庠而觀盛舉已被鴻恩瞻嵩嶽以祝蕃釐載
申微悃伏願配乎天配乎地慶無疆之治於一人
作之君作之師享有道之長於萬世

武宗正德元年三月甲申釋奠於先師孔子

見明史
本紀

明武宗實錄云正德元年四月特授故衍聖公孔
弘泰之子聞詩翰林院五經博士六月辛酉授孔
子五十九代孫彥繩爲翰林院五經博士主衢州
廟祀○闕里志云武宗皇帝視學遣禮部主事張

潛取衍聖公并三氏子孫赴京觀禮幸學禮成命
衍聖公孔聞韶坐藝倫堂聽講御賜回文詩以寵
其行詔孔弘緒次子聞禮襲博士職以孔承泗爲
曲阜令欽賞賜宴照前例

正德二年衍聖公孔聞韶奏改山長職銜爲學錄
正德三年以尼山洙泗二書院及鄒縣子思子廟各
有祀事衍聖公孔聞韶奏請弟聞禮主之

孔聞韶家傳云帝授聞禮五經博士主祀事世以
衍聖公弟爲之著爲令兩書院各設學錄一人薦

族之賢者充焉

正德五年以孔承夏爲曲阜令

正德八年遣山東巡撫都御史趙璜詣闕里祭告

正德十一年以孔公統爲曲阜令

正德十五年重構奎文閣

以上見闕里志

附錄李東陽賦曰闕里宣聖廟舊有奎文閣以貯古今圖籍在大成殿之前杏壇之南金章宗重建規制頗精國朝置衍聖公府其屬有奎文閣典籍一人凡朝廷有事於廟則禮迓香帛虔於閣中以

俟行事弘治己未廟災而閣存工旣就緒殿廡閤麗皆加於舊按察僉事黃君繡謂閣獨弗稱欲撤而新之衆議譁然以爲故物不可廢黃執之益力巡撫都御史徐公源實主之閣成高八丈有奇略與殿等棟宇相埒金碧交映向之譁者始翕然歸之稱全功焉東陽奉勅祭告乃登於茲閣欲賦其事未暇徐公旣歸書數百卷付衍聖公聞韶令典籍孫世忠守之四方藩郡聞而致者日益富徐公使告於予曰閣不可負也乃爲之賦令刻石立於

閣中辭曰偉新廟兮旣宮突高閣兮麗空海之右
兮山之東極灝漾兮爭寵嵒納沆瀣兮超鴻濛表
日觀兮來天風忽秋令兮始肅見奎星兮正中初
徙倚兮欄前暫徘徊兮戶外殿庭兮巍峩與茲閣
兮相對亭碑矗兮林立壇屋隱兮如蓋昔金元兮
始構幾歲序兮更代歎軒楹兮未燼紛瓦礫兮浮
濫及輪奐兮鼎成藹冠裳兮咸萃覽舊蹟兮無餘
撫孤根兮一檜吁嗟乎靡麗兮娉婷彼齊雲兮落
星悵望兮怔營或籌邊兮見京夫豈若覩羹墻兮

故宅誦典則兮遺經宛蝌蚪兮孔壁恍金絲兮魯
聲感春秋兮絕筆憶詩禮兮趨庭存奇文兮籀史
脫虐燄兮秦坑藉神鬼兮呵護閩山川兮精英乃
有韋編兮竹簡石墨兮溪藤汗牛充棟兮不可以
數計又奚問乎何名幽并兮青兗渺宮牆兮在眼
景行兮高山每爲憾兮不淺金書兮玉節幸吾生
兮未晚遡秋霄兮愈沈恨夏日兮猶短仰聖道兮
彌高思古風兮漸遠閱千載兮一時曾一慨兮不
滿睠逸駕兮可攀尚頽波兮在挽噫噓噓靈有地

兮傑有人賢有象兮國有賓下有土兮上高旻軼
倒景兮離塵氛博典冊兮窮皇墳厲夕惕兮求朝
聞豈徒析蟲魚兮隱義辨豕亥兮疑真訝雨粟兮
天半降青藜兮夜分蓋方舞干羽兮七旬徧絃歌
兮八垠占聚緯兮周髀聽圜橋兮成均殆將興兮
吾道庶不朽而俱存○按明洪武間秘書監發下
奎文閣書籍經止於易書詩春秋禮記周禮史則
資治通鑑及元史古文左傳而外惟韓柳文視宋
金元所頒九經三史爲少其時庶事草創書版未

行中書省咨送內開元史一部別科印造未完候
裝潢完備另行發付可知也以後奎文閣重建正
德十五年山東巡按御史熊相巡撫都御史王珣
相與謀廣其藏與提學副使江潮等醵金購書以
實閣記云凡若干金市之於四方以庚辰九月至
又云經書與諸子百家稗官爾雅皆備惜二百年
以來篇章殘缺而其籍不存又按御製書惟宋有
賜太宗御製御書共五百十七軸仁宗累賜三聖
御書然孝經而外多唄誦之言及法帖飛白詩卷

基譜之類卷帙已湮徒有其目在耳至我皇上直
聰迪哲體道性成而撰述弘博仰見宸翰之所臨
摹與內府之所刊刻皆經史之要傳心之錄篇帙
浩瀚富有日新今四子五經日講諸書旣宣賜廟
庭聖製降於纂修之館御書奉於宸翰之樓題額
廟碑卷軸輝麗尚異金匱石室之藏蘭臺西清之
本頒降自天流光億禩不敢冒昧實所仰望云爾

世宗嘉靖元年二月甲寅釋奠於先師孔子

明視學儀考云嘉靖元年定襲封衍聖公率三氏

子孫國子監祭酒率學官諸生上表謝恩皆賜宴
於禮部○闕里志云世宗登極遣吏部尚書石瑤
詣闕里祭告駕幸太學謁廟至櫺星門外卽降輦
步入禮畢仍步出櫺星門外升輦以孔承震爲曲
阜令遣評事呂祚取衍聖公并三氏子孫赴京觀
禮外有乞恩觀禮三氏學生員三名亦准觀禮欽
賞賜宴照前例

嘉靖九年六月癸亥立曲阜孔顏孟三氏學十一月
辛丑更正孔廟祀典定孔子諡號曰至聖先師孔子

以上見明
史本紀

闕里志云嘉靖九年詔兩京國學及天下儒學文
廟俱撤塑像易以木主盡去封爵減國學十二籩
豆爲十籩豆天下府州縣八籩豆舞止用六佾仍
稱啓聖公令國子監並天下學宮皆建啓聖祠祀
聖父叔梁紇而以顏無繇曾點孔鯉孟孫激配饗
程珦朱松蔡元定從祀改稱聖孫爲述聖子思子
○世宗御製正孔子祀典說朕惟孔子之道王者
之道也德王者之德也功王者之功也事王者之

事也特其位非王者之位焉昨輔臣少傅張璪再疏請正其號稱服章等事已命部集翰林諸臣議正外惟號與服章二事所關者重不得不爲言之孔子當周家衰時知其不能行王者之道乃切切以王者之道望於魯衛二國二國之君竟不能明孔子之道孔子既逝後世至唐玄宗乃薦諡曰文宣加以王號至元又益其諡爲大成夫孔子之於當時諸侯有僭王者皆筆削而心誅之故曰孔子作春秋而亂臣賊子懼孔子生如其死乃不體聖

人之心漫加其號雖曰尊崇其實目爲亂賊之徒
是何心哉又我聖祖當首定天下之時命天下崇
祀孔子於學不許祀於釋老之宮又除去塑像止
令設主樂舞用八佾籩豆以十可謂尊崇孔子極
其至矣無以加矣特存其號豈無望於後人哉亦
或當時創未暇與至我皇祖文皇帝始建北京國
學因元人之舊塑像猶存蓋不忍毀之也又至我
皇祖考用禮官之議增樂舞用八佾籩豆用十二
牲用熟而上擬乎事天之禮也夫孔子設或在今

肯安享之昔不觀魯僭王之禮寧自僭事天之禮乎果能體聖人之心決當正之也至於稱王賊害聖人之甚孔子昔曰名不正則言不順言不順則事不成何其不幸身遭之哉夫旣以王者之名而橫加於孔子故使顏回曾參孔伋以子而並配於堂上顏路曾皙孔鯉以父從列於下安有子坐堂上而父食於下乎此所謂名不正者焉皆繇綱領一紊而百目因之以隳耳今也不正滋來世之非道將見子不父其父臣不君其君內離外叛可勝

言哉○正祀典申說朕惟爲人臣盡臣道盡之云者終始生死以之非有所私也孔子曰三年無改於父之道朱子釋之曰祖父所行之事不但三年雖萬世亦不可改也少有可變豈可待之三年夫成法固不可改其餘一切事務不可不急於正之也朕又惟天子不可與匹夫相爭辨斯世斯時却不得不辨也昨所命議正孔子之祀典朕不知典籍且以易明者言之孔子之謚王號自唐玄宗李林甫之君臣始夫孔子已逝在秦漢之前此間豈

無賢明之君如漢高祖唐太宗皆創業垂統者何
不加王號於孔子則不敢擁虛名以示尊崇之意
可知矣李林甫之請玄宗之加意必有爲林甫之
爲臣何等臣也其意或假尊崇師道以欺玄宗歟
玄宗之加也何其巧乎自秦而後王天下者稱皇
帝漢方以王號封臣下玄宗之封謚孔子何不以
皇帝加之是不欲與之齊也特一王號猶封拜臣
下耳尊崇之意何在哉蓋此王字非王天下之王
實後世王公之王也由是夷君武宗假託之而加

謚宋徽宗薦十二章服徽宗之加欲掩其好道教而設此以尊崇耳况以諸侯而薦天子之服章誣之甚也至於雕塑之像不知孔門弟子卽孔子死時而造之且如一人自是一人貌色不知可增損乎抑不可乎以一聖人而信工肆意雕塑曰此是孔子像也殊不知其實是土木之靈耳孔子肯依之享之推己之心則知孔子之心也又至於八佾之舞十二俎豆又僭禮之甚也決所當正○吳沉孔子封王辨後世之禮有似是而實非者不可不

考也且以追謚夫子爲王言之夫子聖人也生不
得位沒而南面之禮尊之其說似矣然王君之號
也夫子人臣生非王爵死而謚之可乎哉昔者夫
子嘗有言曰必也正名乎又曰名不正則言不順
臣而王之於名正乎於言順乎春秋之時有僭稱
王者矣麟經之筆削而黜之蓋名者實之著也無
其實有其名謂之淫名夫子之生也不獲有尺寸
之士今而有天下之號歸之在天之靈其肯歆之
哉嗟夫有德者必有位理之常也有其德而無其

位此則夫子之不幸也會謂以無實之稱而足以爲聖人榮乎哉或曰夫子之道王者之道也謂仲尼素王其來久矣至今封之而不可哉曰謂夫子有王者之道則可謂夫子有王者之號則不可昔者夫子病子路使門人爲臣夫子責之曰久矣哉由之行詐也無臣而爲有臣夫無臣不可以爲有臣非王而可以稱王乎聖人不敢欺天也其可以欺聖人乎然則當若之何曰夫子之澤不被於當時而其教實垂於萬世褒之以王者之貴孰若事

之以師之尊乎書曰天降下民作之君作之師古者治教之職不分君卽師也師卽君也二帝三王盡君師之責者也若夫子則不得爲君而爲師者也師也者君之所不得而臣也故曰雖詔於天子無北面所以尊師也彼以王爵之貴爲隆於稱師者習俗之見也考之經載當時聖人高弟子稱其師有曰孔子有曰夫子其孫子思直字之曰仲尼蓋夫子旣無爵諡則稱之者不曰仲尼必曰夫子觀其門人弟子之不敢過號其師則知以無實之

謚加於聖人必非聖人之意也天下之論每病於
徇同惡異而不本乎至公至當之理談夫子之封
王則必相與和之以爲誇大矣謂夫子不當封王
則必相與咻之以爲狂恠矣吁此所以行之數百
年之久而未敢議其非者彼之不敢議必曰我畏
聖人也此非畏聖人也畏天之罪已也若余之說
則雖得罪於天下不憾也懼得罪於聖人而已曰
請問今將何以尊聖人曰在明其道不在乎王不
王

嘉靖十一年以孔公珏爲曲阜令

以上見闕里志

嘉靖十二年三月丙辰釋奠於先師孔子

見明史本紀

明通紀云嘉靖十二年三月視太學御藝倫堂祭

酒林文俊講虞書益稷篇司業馬汝驥講易頤卦

賜坐講畢諭諸生曰治平之道備在六經諸生宜

講求力行以資治化○世宗實錄云詔天下博求

曾子嫡裔承襲五經博士○闕里志云駕復幸太

學遣官取衍聖公并族人觀禮欽賞賜宴俱照前

例以孔公杰任學錄

嘉靖十三年二月視太學釋奠先師進諸生橫經布

講學官賜帛有差以孔公鉉任學錄

見明通紀

嘉靖十九年以孔彥衢任學錄

嘉靖二十一年以孔公澤爲曲阜令

嘉靖二十五年詔孔子六十三代孫貞幹襲封衍聖公以孔聞韶次子貞寧襲博士職以孔承業爲曲阜令

闕里志云貞幹字用濟嘉靖二十五年襲封衍聖公三十五年七月抱病至京師慶賀萬壽節疾亟

遣御醫徐煒來視八月卒於賜第

嘉靖三十一年以孔彥佩任學錄

以上見闕里志

嘉靖三十二年二月奉安先聖先師於文華殿東室

見明通紀

嘉靖三十五年詔孔子六十四代孫尚賢襲封衍聖

公

闕里志云尚賢字象之號龍宇嘉靖三十五年襲封衍聖公年方十四歲早失怙祖母養育至是拜襲封之命世宗皇帝特勅該部傳與撫按官知道

孔尚賢年幼你不時存問敢有族人恃長欺凌者
指名叅來歷侍四朝三幸辟雍賜宴賜茶冠帶錦
衣稠疊益隆神宗留京隨朝禮遇尤篤天啓元年
十一月卒於賜第

嘉靖四十三年以孔弘廓爲曲阜令

以上見闕里志

穆宗隆慶元年八月癸未朔釋奠於先師孔子

見明史本

紀

闕里志云穆宗登極遣尚寶司卿劉奮庸詣闕里
祭告八月初一駕幸太學遣禮部主事劉繼文取

衍聖公并三氏子孫觀禮欽賞賜宴俱照前例特
賜衍聖公羊酒等物鈔三十貫給家長冠帶

隆慶二年以孔承厚爲曲阜令

隆慶三年工部請修孔廟兗州府通判許際可以杏

壇狹小廓而新之

以上見
闕里志

隆慶四年八月壬戌釋奠於先師孔子

見明史
本紀

神宗萬曆元年遣尚寶司司丞張孟男詣闕里祭告
以孔弘復爲曲阜令

萬曆四年駕幸太學釋奠先師孔子

見明史
本紀

闕里志云遣禮部主事張程取衍聖公并三氏子
孫觀禮欽賞賜宴俱照前例又視學儀考云萬曆
四年定制詣廟之禮儀視嘉靖時稍異

萬曆八年以孔承作任學錄

以上見闕里志

萬曆十年五月庚申免先師孔子後裔賦役有差

見明

史本紀

萬曆十七年以孔承欽任學錄

萬曆二十二年以孔尚賢次子胤桂襲博士職以孔

貞教爲曲阜令

萬曆二十七年以孔貞叢爲曲阜令

萬曆二十八年十二月司業傅新德奏請易孔廟以

琉璃以孔聞諫任學錄

見孔庭纂要

光宗泰昌元年以孔聞評任學錄

熹宗天啓元年遣順天府府丞姚士慎詣闕里祭告
天啓二年詔孔子六十五代孫亂植襲封衍聖公

闕里志云亂植字懋甲後改衍植天啓二年五月
襲封衍聖公早年失怙事母以孝聞於鄉里長而
入繼大爵恢擴大度磊落不凡聖門典故有廢墜

不修者悉力請於朝煥然一新

天啓四年以孔懋德借任博士

天啓五年二月初六日駕幸太學釋奠先師以孔聞簡爲曲阜令

闕里志云遣中書舍人楊中極取衍聖公并四氏子孫族人觀禮奉旨准以恩貢入監該部優選賜宴賜衣如前代尤加

天啓六年特恩准孔聞詩考選吏科給事中

懷宗崇禎元年加衍聖公孔胤植太子太保以孔尚

三聖編全七終
達借任博士

以上見
闕里志

崇禎二年春正月丙子釋奠於先師孔子

見明史
本紀

闕里志云駕幸太學遣中書舍人梁招孟取衍聖公并四氏子孫族人觀禮照例送監讀書賜宴賜衣俱照前例以孔弘毅爲曲阜令

崇禎三年加衍聖公孔胤植太子太傅

崇禎六年以孔尚澄任洙泗書院學錄以孔弘起爲族長又以孔弘養任學錄

崇禎九年以孔謙任尼山書院學錄

崇禎十一年以孔胤統任尼山書院學錄

崇禎十三年以孔貞堪爲曲阜令

以上見闕里志

崇禎十四年八月辛酉重建太學成釋奠於先師孔

子

見明史本紀

闕里志云駕幸太學遣行人取衍聖公五經博士及四氏子孫族人陪祀觀禮恩賜衣宴以孔聞然

任尼山書院學錄

崇禎十六年以孔胤鉅借任博士

見闕里志

附錄皇明紀事云魏瑞忠賢擅權有監生張其捧

魏主位配享孔子廟庭甫入殿輒急返走狂呼子
路打我自門內仆闕外死○蘇學旁有屠兒養豕
常至學歸則跛其足屠兒跡之自學中來一日聞
豕號聲疾趨往視一大夫持杖追擊見屠兒輒不
動蓋子路塑像也屠兒懼俯伏稽首歸像於廟自
此禁錮其豕不敢復令至學



